



Amaran!

Pihak Jabatan Agama Islam Perak tidak bertanggungjawab terhadap sebarang penambahan ayat selain kandungan khutbah yang dikeluarkan.

"GURU BERHIKMAH MEMBINA INSAN SEJAHTERA"

15 Mei 2026 / 27 Zulkaedah 1447

الْحَمْدُ لِلَّهِ¹ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ، لِيُظْهِرَهُ عَلَى الدِّينِ كُلِّهِ وَكَفَىٰ بِاللَّهِ شَهِيدًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَىٰ آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، يَا عِبَادَ اللَّهِ! اتَّقُوا اللَّهَ³ أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dirahmati Ilahi

Marilah kita meningkatkan ketakwaan ke hadrat Allah SWT dengan sebenar-benar takwa, kerana sesungguhnya ketakwaan itu menjadikan kita insan berilmu, ditinggikan darjat seterusnya mendapat keampunan dan kemuliaan di sisi Allah SWT. Bersempena sambutan Hari Guru, mimbar akan menyampaikan khutbah bertajuk: **"GURU BERHIKMAH MEMBINA INSAN SEJAHTERA"**

Firman Allah SWT:

﴿ادْعُ إِلَى سَبِيلِ رَبِّكَ بِالْحِكْمَةِ وَالْمَوْعِظَةِ الْحَسَنَةِ وَجَدِّ لَهُم بِالَّتِي هِيَ أَحْسَنُ إِنَّ رَبَّكَ هُوَ أَعْلَمُ بِمَنْ ضَلَّ عَنْ سَبِيلِهِ وَهُوَ أَعْلَمُ بِالْمُهْتَدِينَ﴾

Bermaksud: "Serulah ke jalan Tuhan Kamu (wahai Muhammad) dengan hikmah dan nasihat pengajaran yang baik dan berbahaslah dengan mereka (yang kamu serukan itu) dengan cara yang lebih baik. Sesungguhnya Tuhan kamu, Dialah yang lebih mengetahui tentang sesiapa yang tersesat daripada jalan Nya dan Dialah yang lebih mengetahui orang yang mendapat hidayah petunjuk."

(Surah An-Nahl ayat 125)

¹ Memuji Allah

² Selawat ke atas Nabi Muhammad SAW

³ Pesan Taqwa



Guru diumpamakan penyambung risalah Rasulullah SAW. Guru ialah insan mulia yang sangat besar jasanya kepada kita. Negara menetapkan tarikh 16 Mei untuk sambutan Hari Guru, bertujuan menghargai jasa, khidmat bakti, dan pengorbanan yang diabdikan oleh guru dalam memenuhi tanggungjawab fardu kifayah, mendidik, membimbing dan mengasuh anak didik mereka; juga menghormati peranan guru membina insan berilmu dan bertakwa hingga menjadi khazanah berharga kepada agama, bangsa dan negara.

Puisi bertajuk 'Obor Hemah' nukilan sasterawan negara A. Samad Said, pada tahun 1988, secara khusus melahirkan kata-kata yang menyanjung khidmat para guru, melalui bait-bait indah yang menggambarkan guru sebagai;

awan indah terbang rendah
melimpahkan hujan pada musim gersang
menyegarkan benih ilmu, berbuah hikmah
guru ...
kitab sejarah dalam bilik darjah
penelaah yang tekun
mewariskan dunia sebagai kutub khanah
menyediakan kutub khanah kepada dunia
guru ... minda segar dan kukuh akar
menghidupkan batin yang bersih
di daerah dunia cemar kasih
guru adalah batin suci hati nurani
pengunjung budi, manusia yang takwa
Obor hemah kehidupan bangsa.

Bait-bait dalam puisi tersebut menggambarkan guru sebagai insan mulia yang menyemai ilmu, membentuk insan, dan menjadi pelita menyalakan obor kehidupan bangsa. Guru dipuji sebagai penyegar ilmu yang senantiasa tenang, tekun dan mendidik dengan kasih sayang.

Jemaah yang dilimpahi ilmu Ilahi

Guru yang paling agung ialah Rasulullah SAW. Baginda mendidik para sahabat secara berhikmah, mendidik bukan dengan kekerasan tetapi dengan akhlak yang luhur, kesabaran dan kebijaksanaan sehingga lahir generasi terbaik.



Rasulullah SAW membetulkan kesalahan tanpa memalukan, menegur tanpa merendahkan, dan mendidik tanpa mematahkan jiwa. Lembut pada masanya dan tegas pada tempatnya. Pendekatan Rasulullah SAW merupakan kaedah didikan berhikmah, selaras dengan ayat 125 surah An-Nahl yang khatib baca pada awal khutbah, lalu berjaya melahirkan manusia yang sejahtera dunia dan akhirat.

Seruan hikmah pada ayat tersebut mempunyai kaitan yang sangat rapat dengan guru kerana tugas guru bukan sekadar menyampaikan ilmu, tetapi juga membimbing manusia ke arah mengenal kebaikan – mencapai kesejahteraan, dibina melalui didikan berhikmah.

Mimbar menyenaraikan lima ciri guru berhikmah:

Pertama: Kejayaan menggabungkan ilmu dan akhlak, mempamerkan sikap ilmuwan, mendidik dengan kebijaksanaan mengimbangi pembangunan rohani dan jasmani juga keperluan duniawi dan ukhrawi.

Kedua: Mendidik dengan ikhlas, beramanah, bersifat penyabar, penyayang, ikhlas dan adil.

Ketiga: Prihatin dan peka dengan keperluan murid; bijak mengenal pasti tahap keupayaan, minat, bakat dan kecenderungan pelajar yang berbeza dan pelbagai; lalu menggunakan pendekatan yang sesuai agar tiada pelajar yang tercicir; setiap pelajar diasuh, dibimbing dan diberikan dorongan berdasarkan minat, bakat dan kecenderungan masing-masing.

Keempat: Sentiasa bersedia meningkatkan pengetahuan, kemahiran dan kepakaran; berani menerokai bidang-bidang baharu yang dapat membantu mengemaskinikan kaedah pengajaran berteraskan teknologi moden.

Kelima: Tidak hanya menyasarkan kecemerlangan pencapaian akademik tetapi memastikan anak didik cemerlang sahsiah, stabil emosi dan menjadi warga yang memiliki jati diri.



Sesungguhnya, guru yang mendidik secara berhikmah, berupaya menghasilkan warga yang berhikmah, berilmu dan beradab, berupaya menjaga hubungan baik sesama manusia dan alam. Rasulullah SAW bersabda:

إِنَّ الرَّفْقَ لَا يَكُونُ فِي شَيْءٍ إِلَّا زَانَهُ

Bermaksud: "Sesungguhnya sikap lemah lembut (pendekatan berhikmah) tidak ada pada sesuatu melainkan ia akan menghiasinya (menjadikannya indah)"

(Hadis Riwayat Muslim)

Jemaah Rahimakumullah

Bersempena sambutan Hari Guru, mimbar memperingatkan tiga perkara berikut:

Pertama: Islam mengangkat tinggi martabat guru, meletakkan guru bertaraf mulia sesuai dengan kedudukan ilmu; *muallim dan murabbi* yang memikul amanah untuk mencerahkan minda, menyampaikan ilmu dan membina insan sejahtera.

Kedua: Hargailah guru-guru yang begitu besar jasa mereka dalam hidup kita. Tunjukkan adab berterima kasih kepada guru dengan menghormati mereka dan menghargai jasa mereka, serta mendoakan kesejahteraan mereka. Jadikan iktibar bait-bait yang terkandung dalam puisi 'Guru! Oh Guru' nukilan Sasterawan Negara Usman Awang. Antara bait-bait yang dinukilkan menghormati dan menghargai guru ialah;

"Dialah ibu dialah bapa juga sahabat
Alur kesetiaan mengalir nasihat.
Jika hari ini seorang Perdana Menteri berkuasa
Jika hari ini seorang raja menaiki takhta
Jika hari ini seorang Presiden sebuah negara
Jika hari ini seorang ulama yang mulia
Jika hari ini siapa sahaja menjadi dewasa
Sejarahnya dimulakan oleh seorang guru biasa
Dengan lembut sabarnya, mengajar tulis baca
Di mana-mana dia berdiri di muka muridnya
Dia adalah guru mewakili seribu buku
Semakin terpencil duduknya di ceruk desa
Semakin bererti tugasnya kepada negara"



Khutbah Kedua

الْحَمْدُ لِلَّهِ⁴ حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ
وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, serta para ulama yang muktabar meliputi aliran *Asya'irah* dan *Maturidiyyah*. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ
عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ
حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ
وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَتَثِّبْهُمْ عَلَى مِلَّةِ رَسُولِ اللَّهِ ﷺ.
اللَّهُمَّ أَعِزِّ الْإِسْلَامَ وَالْمُسْلِمِينَ وَأَنْصُرْ إِخْوَانَنَا وَأَخَوَاتِنَا وَأَطْفَالَنَا فِي فَلَسْطِينَ، وَاحْفَظْ
أَهْلَهَا وَأَنْصُرْ جُنُودَهَا وَدَمِّرْ أَعْدَائِكَ أَعْدَاءَ الدِّينِ يَا رَبَّ الْعَالَمِينَ.

Ya Allah! Ya Rabbal 'alamin!, Limpahkan keberkatan, kebaikan dan kesejahteraan terhadap warga guru yang sedang melaksanakan tugas fardu kifayah, mengilmukan dan mendidik sahsiah anak didik mereka; kurniakan mereka kesabaran, ketabahan dan kekuatan untuk terus berbakti. Terimalah amalan mereka sebagai amal makruf

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



yang dikurniakan ganjaran dunia – ganjaran akhirat. Cucurilah rahmat Mu kepada roh guru-guru kami yang sedang berada di alam barzakh.

Ya Mannan! Ya Razzaq!, berkatilah hamba Mu yang melaksanakan zakat, wakaf dan sedekah. Kurniai mereka rezeki berlipat ganda, sucikan harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Mu'min! Ya Muhaimin! Jauhi kami daripada kemurkaan Mu; jauhi kami daripada termasuk dalam kalangan orang-orang yang terhalang mendapat nikmat Mu; jauhi kami daripada kesengsaraan, bencana dan malapetaka. Jauhi kami daripada kejahilan dan kezaliman. Limpahi rahmat Mu agar negara kami berada dalam keadaan selamat dan makmur, rakyatnya hidup dalam suasana aman dan muhibah.

Ya Maalikal Mulk! Lantiklah untuk urusan kami, orang-orang yang terbaik dalam kalangan kami. Jangan Engkau lantik untuk urusan kami, orang-orang yang terburuk dalam kalangan kami. Hindari negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah lagi ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Muiz! Ya Adzhiim! Ya Kabiir!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ
عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.